

47-bob. Bojxona to'lovlari to'lanishini ta'minlash

336-modda. Bojxona to'lovlari to'lanishini ta'minlashning qo'llanilishi

Bojxona to'lovlari to'lanishini ta'minlash ushbu Kodeksning [87](#), [93](#), [95](#), [222](#), [223](#), [236](#), [272](#), [321](#) va [329-moddalarida](#) belgilangan hollarda qo'llaniladi.

(336-moddaning birinchi qismi O'zbekiston Respublikasining 2018-yil 3-oktabrdagi O'RQ-494-sonli [Qonuni](#) tahririda — Qonun hujjatlari ma'lumotlari milliy bazasi, 04.10.2018-y., 03/18/494/1992-son)

Bojxona to'lovlari to'lanishini ta'minlash bojxona organlariga tovarlar chiqarib yuborilguniga qadar yoxud shunday ta'minlashni nazarda tutuvchi harakatlar amalga oshirilguniga qadar taqdim etilishi kerak.

337-modda. Bojxona nazorati ostida turgan tovarlarga nisbatan bojxona to'lovlari to'lanishini ta'minlashning miqdori

Quyidagi tovarlarga nisbatan bojxona to'lovlari to'lanishini ta'minlashning miqdori erkin muomalaga chiqarish (import) bojxona rejimiga joylashtirish ma'lum qilinganda to'lanishi lozim bo'lgan bojxona to'lovlarining va foizlarning summasiga mos bo'lishi kerak:

ushbu Kodeksning [222](#) va [223-moddalarida](#) nazarda tutilgan, bojxona hududida bojxona nazorati ostida olib o'tiladigan tovarlarga;

bojxona ombori maqomiga ega bo'lmagan joylarda saqlanayotgan tovarlarga;

shartli bojxona qiymati qo'llanilgan holda chiqarib yuboriladigan tovarlarga;

bojxona to'lovlarini kechiktirib yoki bo'lib-bo'lib to'lash qo'llanilgan holda chiqarib yuboriladigan tovarlarga;

bojxona yuk deklaratsiyasi topshirilguniga qadar chiqarib yuboriladigan tovarlarga.

338-modda. Nazorat qilinishi bojxona organlarining zimmasiga yuklatilgan faoliyatni amalga oshirishda bojxona to'lovlari to'lanishini ta'minlashning miqdori

Nazorat qilinishi bojxona organlariga yuklatilgan faoliyatni amalga oshirish uchun bojxona to'lovlari to'lanishini ta'minlash quyidagi miqdorlarda taqdim etiladi:

(338-moddaning ikkinchi xatboshisi O'zbekiston Respublikasining 2018-yil 3-oktabrdagi O'RQ-494-sonli Qonuniga asosan chiqarilgan — Qonun hujjatlari ma'lumotlari milliy bazasi, 04.10.2018-y., 03/18/494/1992-son)

agar bojxona ombori yoki erkin ombor sifatida ochiq maydoncha ma'lum qilinayotgan bo'lsa, bir kvadrat metr maydon uchun bazaviy hisoblash miqdorining besh baravari miqdorida yoki agar bojxona ombori yoxud erkin ombor sifatida tegishincha bino ma'lum qilinayotgan bo'lsa, binoning bir kub metr hajmi uchun bazaviy hisoblash miqdorining bir baravari miqdorida, lekin bazaviy hisoblash miqdorining ikki ming baravaridan kam bo'lmagan summasi miqdorida — bojxona ombori yoki erkin ombor egalari uchun;

(338-moddaning ikkinchi xatboshisi O'zbekiston Respublikasining 2019-yil 3-dekabrdagi O'RQ-586-sonli Qonuni tahririda — Qonun hujjatlari ma'lumotlari milliy bazasi, 04.12.2019-y., 03/19/586/4106-son)

bazaviy hisoblash miqdorining besh ming baravari miqdorida — boj olinmaydigan savdo do‘konlarining egalari uchun;

(338-moddaning uchinchi xatboshisi O‘zbekiston Respublikasining 2019-yil 3-dekabrdagi O‘RQ-586-sonli Qonuni tahririda — Qonun hujjatlari ma’lumotlari milliy bazasi, 04.12.2019-y., 03/19/586/4106-son)

bazaviy hisoblash miqdorining ikki ming baravari miqdorida — bojxona tashuvchisi uchun.

(338-moddaning to‘rtinchi xatboshisi O‘zbekiston Respublikasining 2019-yil 3-dekabrdagi O‘RQ-586-sonli Qonuni tahririda — Qonun hujjatlari ma’lumotlari milliy bazasi, 04.12.2019-y., 03/19/586/4106-son)

339-modda. Bojxona to‘lovlari to‘lanishini ta’minlash usullari

Bojxona to‘lovlari to‘lanishini ta’minlash to‘lovchining tanloviga ko‘ra quyidagi istalgan usullar orqali amalga oshiriladi:

pul mablag‘larini bojxona organining shaxsiy g‘azna hisobvarag‘iga kiritish;

tovarlarni garovga qo‘yish;

bank kafolatini taqdim etish;

bojxona to‘lovlarini to‘lash majburiyatini sug‘urtalash;

kafillik.

340-modda. Pul mablag‘larini bojxona organining shaxsiy g‘azna hisobvarag‘iga kiritish va ularni qaytarish shartlari

To‘lovchi bojxona to‘lovlari to‘lanishini ta‘minlash uchun bojxona organining shaxsiy g‘azna hisobvarag‘iga ushbu Kodeksning [337](#) va [338-moddalarida](#) belgilangan miqdorda pul mablag‘lari summasini kiritadi.

Pul mablag‘lari bojxona organining shaxsiy g‘azna hisobvarag‘iga (bundan buyon matnda depozit deb yuritiladi) O‘zbekiston Respublikasining milliy valyutasida, qonun hujjatlarida nazarda tutilgan hollarda esa chet el valyutasida kiritiladi.

Saqlangan vaqt uchun depozit summasiga foizlar hisoblanmaydi.

Depozitni qaytarish to‘lovchining arizasi bojxona organi tomonidan olingan kundan e‘tiboran besh ish kunidan kechiktirmay mazkur arizaga ko‘ra amalga oshiriladi.

Depozitni qaytarish to‘g‘risidagi ariza to‘lovchi tomonidan bojxona organiga majburiyat bajarilganidan keyin, lekin majburiyat bajarilgan kunning ertasidan e‘tiboran uch yildan kechiktirmay beriladi. Agar depozitni qaytarish to‘g‘risidagi ariza belgilangan muddatda berilmagan bo‘lsa, depozit summasi bojxona organi tomonidan O‘zbekiston Respublikasi Davlat budjetiga o‘tkaziladi.

To‘lovchi tomonidan depozit bilan ta‘minlangan majburiyat bajarilmagan taqdirda, kiritilgan pul mablag‘lari bojxona to‘lovlarini to‘lash bo‘yicha qarzdorlikni to‘lash hisobiga depozit summasidan olinadi.

341-modda. Bojxona nazorati ostida tovarlar tashilayotganda majburiyat bajarilishini ta'minlash uchun kiritilgan depozitni qaytarish

Bojxona nazorati ostida tovarlar tashilayotganda majburiyat bajarilishini ta'minlash uchun kiritilgan depozitni qaytarish to'g'risidagi ariza depozit qaysi bojxona organining shaxsiy g'azna hisobvarag'iga tushgan bo'lsa, o'sha bojxona organiga yoxud bojxona nazorati ostida tovarlarni tashish tugallanayotgan bojxona organiga beriladi.

Tovarlarni tashish majburiyatlari bajarilganligi bojxona nazorati ostida tovarlarni tashish tugallanayotgan bojxona organi tomonidan tasdiqlanganidan keyin ikki ish kuni ichida bojxona organi bojxona nazorati ostida tovarlar tashilayotganda majburiyat bajarilishini ta'minlash uchun kiritilgan depozit qaytarilishini amalga oshiradi.

Bojxona nazorati ostida tovarlar tashilayotganda majburiyat bajarilishini ta'minlash uchun kiritilgan depozitni qaytarish to'lov qaysi valyutada kiritilgan bo'lsa, o'sha valyutada bojxona organi tomonidan amalga oshiriladi.

342-modda. Bojxona to'lovlari to'lanishini ta'minlash sifatida tovarlar garovini qo'llash

Bojxona to'lovlari to'lanishini ta'minlash sifatida garov to'g'risidagi shartnoma asosida tovarlar garovi qo'llanilishi mumkin.

Har qanday tovar garov narsasi bo'lishi mumkin, bundan quyidagilar mustasno:

elektr, issiqlik energiyasi va energiya boshqa turlari;

korxonalar, binolar, qurilmalar, inshootlar, yer uchastkalari, fazoviy obyektlar;

boshqa majburiyatlarni ta'minlash uchun garovga qo'yib bo'lingan tovarlar;

intellektual mulk obyektlari;

bojxona hududiga olib kirilishi taqiqlangan tovarlar;

tez buziladigan tovarlar;

jonivorlar;

O'zbekiston Respublikasi hududidan tashqarida bo'lgan tovarlar;

realizatsiya qilish imkoniyati cheklangan tovarlar;

joylashgan yeri va foydalanilishi ustidan bojxona organi doimiy nazoratni ta'minlay olmaydigan tovarlar;

qonun hujjatlariga muvofiq erkin realizatsiya qilinishi taqiqlangan ishlab chiqarish mahsulotlari va chiqindilari.

Bojxona chegarasi orqali olib o'tiladigan va sertifikatlanishi yoki davlatning boshqa organlari nazoratida bo'lishi lozim bo'lgan tovarlar sertifikatlar, ruxsatnomalar va tovarlar chiqarib yuborilayotganda zarur bo'lgan boshqa hujjatlar bo'lgan taqdirdagina garov narsasi bo'lishi mumkin.

Garov narsasining bozor qiymatini aniqlash uchun uning baholanishi garovga qo'yuvchi hisobidan baholash faoliyati to'g'risidagi qonun hujjatlari talablariga muvofiq amalga oshiriladi.

Garov narsasining bozor qiymati to'lanishi garov narsasi bilan ta'minlanadigan bojxona to'lovlariga doir majburiyatlar, shu jumladan tovarlarning ularni saqlash va realizatsiya qilish bo'yicha zarur xarajatlarning o'rnini qoplash uchun bozor qiymatidan o'n besh foizi qo'shib hisoblangandagi majburiyatlar miqdoridan kam bo'lmasligi kerak.

Ushbu Kodeksning [93](#) va [236-moddalarida](#) nazarda tutilgan hollarda, shuningdek bojxona ombori, boj olinmaydigan savdo doʻkoni va erkin ombor faoliyatini litsenziyalashda bojxona toʻlovlari toʻlanishini taʼminlash sifatida tovarlarni garovga qoʻyish qoʻllanilmaydi.

343-modda. Bojxona toʻlovlari toʻlanishini taʼminlash sifatida tovarlarni garovga qoʻyishga doir talablar

Tovarlarni garovga qoʻyish bojxona organi va kafolat shartnomasi boʻyicha toʻlovchi yoki boshqa shaxs boʻlishi mumkin boʻlgan garovga qoʻyuvchi oʻrtasidagi garov toʻgʻrisidagi shartnoma bilan rasmiylashtiriladi.

Garov toʻgʻrisidagi shartnoma yozma shaklda tuzilgan va notarial tartibda tasdiqlangan boʻlishi kerak.

Garovga qoʻyuvchi garov toʻgʻrisidagi shartnomaga muvofiq garov narsasini tasarruf etishga haqli.

Garov toʻgʻrisidagi shartnoma qonun hujjatlarida belgilangan tartibda tuziladi.

344-modda. Bojxona toʻlovlari toʻlanishini taʼminlash sifatida bank kafolatini qoʻllash

Bojxona toʻlovlari toʻlanishini taʼminlash sifatida Oʻzbekiston Respublikasida bank operatsiyalarini oʻtkazish huquqiga ega boʻlgan bankning kafolati qoʻllanilishi mumkin.

Bank kafolatida koʻrsatilgan bojxona toʻlovlari toʻlanishini taʼminlash summasining miqdori toʻlanishi lozim boʻlgan bojxona toʻlovlarining va foizlarning summasidan kam boʻlmasligi kerak.

Toʻlovchi tomonidan bank kafolati bilan taʼminlangan majburiyat bajarilmagan taqdirda, toʻlanishi lozim boʻlgan

bojxona to'lovlarining summasi va foizlar qonun hujjatlariga muvofiq so'zsiz tartibda kafolat bergan bankdan bojxona organi tomonidan undirib olinadi.

345-modda. Bojxona to'lovlari to'lanishini ta'minlash sifatida sug'urta majburiyatini qo'llash

Bojxona to'lovlari to'lanishini ta'minlash sifatida to'lovchining fuqarolik javobgarligini sug'urtalash shartnomasiga ko'ra sug'urtalovchining majburiyatlari kuchga kirganligini tasdiqlovchi sug'urta polisi qo'llanilishi mumkin.

Sug'urta polisi bilan tasdiqlanadigan bojxona to'lovlari to'lanishini ta'minlash summasining miqdori to'lanishi lozim bo'lgan bojxona to'lovlarining va foizlarning summasidan kam bo'lmasligi kerak.

Sug'urta polisi bilan ta'minlangan majburiyat to'lovchi tomonidan bajarilmagan taqdirda bojxona to'lovlarining summasi va foizlar sug'urta polisini bergan sug'urtalovchidan bojxona organi tomonidan so'zsiz tartibda qonun hujjatlariga muvofiq undirib olinadi.

346-modda. Bojxona to'lovlari to'lanishini ta'minlash sifatida kafillikning qo'llanilishi

Kafilning bojxona to'lovlari to'lanishi uchun mas'ul bo'lgan shaxs o'rniga bojxona to'lovlari va foizlarning to'lanishini ta'minlash niyati to'g'risidagi yozma majburiyati bojxona to'lovlari to'lanishini ta'minlash sifatida qo'llanilishi mumkin.

Kafil sifatida har qanday yuridik yoki jismoniy shaxs ish yuritishi mumkin.

Kafil ushbu Kodeksning [340-moddasiga](#) muvofiq bojxona organining shaxsiy g'azna hisobvarag'iga ta'minlash

summalarini kiritish orqali bojxona to'lovlari to'lanishini ta'minlashni amalga oshiradi.

Kafillik bilan ta'minlanadigan majburiyat bajarilmaganligi uchun kafil va to'lovchi bojxona organi oldida solidar javobgar bo'ladi.